

Partenza fulminonta per las damas dils Desertina Bulls

La dumengia vargada han las damas dils Desertina Bulls entschiet la sesiun d'uni-hoc a Sargans. L'equippa sursilvana era sepreparada intensivamein duront ils trenaments da stad. Denter auter ein ellas stadas igl uost treis dis en in camp da trenament a Tenero. Cun quellas bunas premissas ein ellas idas plein fidonza egl'emprem giug encunter Zürisee Unihockey.

Desertina Bulls - Zürisee Unihockey 9:1

Punct las 10.00 arva igl arbiter il giug ed ils Desertina Bulls attaccan las adversarias cun in nundetg tempo. Suenter duas minutas dat *Aline Cajacob* in pass ad *Alexandra Flepp* che marca cun in bi siet da distanza igl'emprem gol pils Bulls. Ella quarta minuta survegn *Tamara Derungs* la balla, fa in solo sur igl'entir plaz, dat il pass sin *Aline Cajacob* e lezza ha in bien egl per *Gada Cathomas* che sietta il 2:0. Il Bulls mettan igl'adversari enorm sut squetsch ed aschia vegn *Jana Caduff* da sittar enteifer paucas secuntas dus ulteriurs gols pils Bulls sin pass da *Selina Giger*. Las adversarias ein schoccadas e han piars il fil dil giug. Quei nezzegian ils Bulls. Avon pausa sietta *Gada Cathomas* il meritau 5:0. Suenter pausa ha il trenader dau la caschun dad ina ni l'otra ulteriura giugadura da mussar tgei ch'ella sa. Quella fidonza ha *Anica Seiler* nezzegiau. Cugl'emprem contact da balla marca ella cun in bellezza siet sut la traversa il 6:0 pils Desertina Bulls. Zürisee pren in time out ed entras quel vegnan ellas levet meglier el giug. Cun *Mila Demont* en gol han las Sursilvanas denton ina ferma petga che parescha quels paucs siets che vegnan sin gol. Ils Bulls laian buca luc e vulan rimnar vinavon massa puncts. Cun bialas cumbinaziuns vegnan las giuvnas dalla Romontschia adina puspei tier bunas caschuns avol gol dallas adversarias. *Gada Cathomas* realisescha cun dus ulteriurs gols sin pass dad *Anica Seiler* ed *Aline Cajacob* ina tripletta. Sco davos ha era aunc *Tamara Derungs* sittau siu'emprem gol da campinadi e segirau all'equippa ina grondiusa victoria. Cun 9:1 han las damas dalla Surselva gudignau igl'emprem giug da campinadi.

Desertina Bulls – Schaffusa 2:1

Suenter ina cuorta pausa spitgava igl'adversari da Schaffusa sillas Sursilvanas. Quei ei ina giuvna equipa che dat tacticamein fetg bein. Per spargnar forzas han ils Bulls dau in tec pli defensiv e mirau tgei che las adversarias fan. Aschia ein lezzas era vegnidas tier las empremas bunas schanzas dad ir en avantatg. *Marina Bearth* en gol dils Bulls ha denton parau quels siets. Plaunziun ein era las Sursilvanas vegnidas meglier el giug. Cun dus siets ella petga ei il cletg denton aunc buca staus silla vart dallas Grischunas. Suenter pausa han las damas da Mustér alzau il tempo e prompt ein ellas vegnidas tier massa bunas schanzas. Adina puspei

maunca ei fetg pauc per ch'ils Bulls savessan marcar igl emprem gol. Sco igl ei il bia, tgi che fa buc els survegn els. Aschia sietta Schaffusa suenter in sbagl ella defensiva igl emprem gol dil giug. Quei ha buca mumentau fetg ils Bulls. Cun in enorm spért d'equipa e cun plein perschasiun d'aunc gudignar quei giug aulzan ellas aunc inagada il tempo. Cun in bellezza siet ord la distanza egalisescha Alexandra Flepp. Ei va aunc tschun minutas e l'equipa da Mustér vul mo ina caussa, gudignar quei giug. Duas minutas avon la fin dat Gada Cathomas ina biala cumbinaziun da pass sin Alexandra Flepp che sietta il 2:1 pils Bulls. Tuttas giugaduras seglian sil plaz e festiveschan quei gol sco sch'ei havessan gudignau il campinadi. Quei muossa tgei plascher e tgei spért d'equipa che regia ell'equipa. Cun quellas duas victorias tuornan ellas anavos ella Surselva cun quater puncts.

Desertina Bulls cun Tamara Derungs, Selina Giger, Anna Quinter, Alexandra Flepp, Corina Venzin, Anica Seiler, Gada Cathomas, Janna Venzin, Aline Cajacob, Fabiana Bearth, Estella Mazzetta, Jana Caduff, Mila Demont, Marina Bearth e Noemi Zanin.